

Mensajen Introdusaun husi Ministru Finanzas, Rui Augusto Gomes iha Okaziaun Jornada Planeamentu 2023

Díli, 26 Abril 2022

Sua Exelénsias,
Señór Primeiru-Ministru, Jenerál Taur Matan Ruak,
Membrus Oitavu Governu Konstitusionál Tomak,
Prezidente Komisaun Funsau Públiku
Reprezentante Prezidente Rejiaun Administrativa Espesiál Oecusse Ambeno,
Prezidente Autoridade no Administradór Munisípius,
Responsavéis Servisus Fundu Autónoma,
Reprezentante Sosiedade Sivil, Konfisaun Relijiozu sira, Setór Privadu
Diretores Gerais, Jestores, Assesores, Téknikus Finanzas Públikas,
Distintos Convidados, Senhoras e Senhores,

Dadeer dí'ak no Bemvidu mai Semináriu Jornada Planeamentu tinan 2023!

Uluk nanain, ha'u hakarak hato'o votos sinceros ba Ita-Boot sira hotu ne'ebé marka prezensa iha ne'e, kontinua isin no neon-dí'ak nafatin hodi bele presta servisu, serbí Povu no Ita-nia Rai-doben Timor-Leste.

Sorumutuk ohinloron ida-ne'e nu'udar ponto de partida husi Ita-nia prosesu Planeamentu no elaborasaun Lei das Grandes Opções do Plano haktuir espíritu Lei Foun Enkudramentu Orsamentál ne'ebé Sua Exelénsia Prezidente da República promulga ona iha fulan-fevereiru liubá. Promulgasaun ba Lei Foun Estruturante ida-ne'e nu'udar pasu importante no konkista boot ida ne'ebé Oitavu Governu Konstitusionál halo liuliu iha área Reforma Jestaun Finanseira Públikas.

Distintos Convidados, Senhoras e Senhores,

Jornada Planeamentu ne'e hanesan Jornada ba dahuluk iha istória Timor-Leste depois de restaura ninia independénsia iha tinan 20 liubá.

Sesaun traballu ohinloron mai ho tema "Mai Ita Hamutuk Identifika Medidas Prinsipál ba OJE 2023, hodi Rekupera Ita-nia Ekonomia no Promove Kresimentu Ekonómiku ne'ebé Inkluzivu no Sustentável".

Tema ida-ne'e importante tebes ba Ita hotu iha ne'e atu diskute, identifika no halo apresiasaun ba ezbosu medidas prinsipál ba OJE 2023 ho objetivu atu recupera ekonomia no promove kresimentu ekonómiku ida ne'ebé Inkluzivu no sustentável.

Distintos Convidados, Senhoras e Senhores,

Hakarak atu informa ba Ita-Boot sira hotu ne'ebé marka prezensa iha Auditóriu ne'e katak servisus preparasaun iha nivel tékniku ba Proposta Projetu Lei das Grandes Opções do Plano la'o ho intensivu iha fulan ida ho balun ona ne'ebé envolve rekollamentu medidas setoriál no konsultasaun téknika ho entidade sira ne'ebé hola parte iha perimetru orsamentál.

Ministériu Finansas halo analize ba medidas husi entidade sira hodi asegura katak medidas hirak ne'e aliña ho Planu Estratéjiku Dezenvolvimentu, Programa Oitavu Governu Konstitusionál, Planu Estratéjiku Setorál, Planu Rekuperasaun Ekonómiku no dokumentu estratéjiku aprovalu seluk no ikus liu halo aliñamentu ba Rezultadu Nasionál (National Outcomes) ne'ebé daudaun ne'e dezenvolve Ajénsia Nasionál Planeamentu, Avaliasaun no Monitorizasaun (ANAPMA) dezenvolve hela.

Bazeia ba analize ne'e, Ministeriu Finansas kualifika ona medidas lubuk ida ne'ebé hatuur tuir subsetór PED nian ne'ebé prezisa Ita hotu nia apresiasaun iha Semináriu ida-ne'e.

Iha minutu balun tuir-mai, depoisde Abertura, Diretór Jerál Planeamentu no Orsamentu, Sr. Jose Alexandre de Carvalho no Diretór Nasionál Orsamentu, Sr. Salomão Yoaquim sei apresenta mai Ita hotu, detalla kona-ba Mekanismu Elaborasaun Grandes Opções do Plano no Medidas Prinsipál OJE 2023.

Distintos Convidados, Senhoras e Senhores,

Ezersísiu ida-ne'e hanesan ezersísiu ida ne'ebé foun no kompleksu tebes, maibé Diresaun Jerál Planeamentu no Orsamentu, ne'ebé lidera husi Diretór Jerál Jose Alexandre de Carvalho ho koordenaun ho ANAPMA, ohin, Ita bele hetan rezultadu ezbosu Planeamentu tuir Lei Foun Enkudramentu Orsamentál.

Parabéns

DG Alex ho nia ekipa tomak nomós ekipa husi ANAPMA ne'ebé lidera husi Sr. Ageu Jorge Cardoso!

Ikus liu, mai Ita rona orientasaun polítika kona-ba prioridades ba Planeamentu tinan 2023 ne'ebé mak sei hato'o husi Sua Exelénsia Primeiru-Ministru, Jenerál Taur Matan Ruak.

Obrigadu!